

Na osnovu člana 15. Zakona o Upravi za indirektno oporezivanje ("Službeni glasnik Bosne i Hercegovine", broj 89/05), člana 61. stav 2. Zakona o upravi ("Službeni glasnik Bosne i Hercegovine", broj 32/02) i člana 57. Zakona o carinskoj politici Bosne i Hercegovine ("Službeni glasnik Bosne i Hercegovine", broj 57/04 i 51/06), direktor Uprave za indirektno oporezivanje d o n o s i

U P U T S T V O

O PROVEDBI CARINSKOG POSTUPKA KOD UVOZA I IZVOZA ELEKTRIČNE ENERGIJE

GLAVA I OPĆI DIO

Član 1. (Predmet)

Ovim uputstvom bliže se propisuje provedba carinskog postupka u vezi s električnom energijom koja se uvozi u i izvozi iz carinskog područja Bosne i Hercegovine prenošenjem fiksnim instalacijama - međudržavnim prekograničnim dalekovodima opremljenim odgovarajućim mjernim instrumentima i druga pitanja u vezi s tim postupkom.

Član 2. (Primjena propisa)

Kod uvoza i izvoza električne energije primjenjuju se carinski i drugi važeći propisi kojima je reguliran carinski postupak za koji je, nadležnim carinskim organima, prijavljena električna energija.

Član 3. (Korisnik carinskog postupka)

Korisnik carinskog postupka u Bosni i Hercegovini pri uvozu i izvozu električne energije može biti svako lice koje od Državne regulatorne komisije za električnu energiju Bosne i Hercegovine (DERK) dobije privremenu ili stalnu licencu za međunarodnu trgovinu električnom energijom i ispunjava i druge uslove propisane za taj postupak.

GLAVA II STAVLJANJE ELEKTRIČNE ENERGIJE U SLOBODAN PROMET

Član 4.

(Stavljanje električne energije u slobodan promet)

Stavljanje električne energije u slobodan promet je svaki unos električne energije u carinsko područje Bosne i Hercegovine za upotrebu u Bosni i Hercegovini, bilo da je ona za tu namjenu kupljena ili nabavljena u "naturalnoj razmjeni električne energije" izvan Bosne i Hercegovine, osim električne energije koja se prima iz susjednih elektroenergetskih sistema i služi za anuliranje odstupanja od dogovorenih programa razmjene nastalih u toku realiziranja programa i anuliranje razlike između mjesečnog očitavanja brojila i evidentiranih satnih podataka (u daljnjem tekstu: uvoz).

Član 5.

(Carinska prijava za stavljanje električne energije u slobodan promet)

(1) Lice iz člana 3. ovog uputstva koje uvozi električnu energiju (u daljnjem tekstu: uvoznik) dužno je, do zadnjeg dana u tekućem mjesecu, za sav uvoz električne energije u prethodnom mjesecu podnijeti carinsku prijavu za carinski postupak stavljanja električne energije u slobodan promet (IM 4 prijava).

(2) Carinska prijava iz stava (1) ovog člana popunjava se u skladu s propisima kojima je regulirano pitanje popunjavanja carinskih prijava i mora sadržavati svu količinu i vrijednost električne energije uvezene u mjesecu za koji se podnosi. U polju 31 carinske prijave mora se navesti i naznaka mjeseca na koji se prijava odnosi (npr. "uvoz u januaru 2007.").

(3) Carinska prijava iz stava (1) ovog člana podnosi se carinskoj ispostavi nadležnoj prema sjedištu uvoznika. Uz carinsku prijavu prilaže se:

- a) faktura ili drugi odgovarajući komercijalni dokumenat koji, između ostalog, mora sadržavati podatke o prodavcu, kupcu, količini i vrijednosti uvezene električne energije, period na koji se odnosi, poziv na broj i datum ugovora o kupovini/prijemu električne energije,
- b) ovjerena izjava uvoznika o količini uvezene električne energije u periodu za koji se podnosi, na obrascu iz Priloga 1. ovog uputstva,
- c) mjesečni izvještaj o prekograničnoj trgovini električnom energijom izdat i ovjeren od Neovisnog operatera sistema u Bosni i Hercegovini, nadležnog za evidentiranje i kontrolu svih transakcija na prijenosnoj mreži elektroenergetskog sistema Bosne i Hercegovine (u daljnjem tekstu: NOS BiH) i
- d) po potrebi, na zahtjev nadležnog carinskog organa, predočiti ugovor o kupovini/prijemu električne energije.

Član 6.
(Obračun i plaćanje indirektnih
poreza na uvoz električne energije)

Po carinskoj prijavi iz člana 5. ovog uputstva obračunavaju se i naplaćuju uvozne dažbine i drugi indirektni porezi primjenjivi na uvoz električne energije prema propisima važećim na dan podnošenja carinske prijave i to na ukupnu količinu i vrijednost električne energije uvezene u periodu za koji se podnosi carinska prijava, a ne samo na eventualnu razliku uvoza i izvoza, odnosno eventualnu razliku između preuzimanja i isporuke električne energije u "naturalnoj razmjeni".

GLAVA III IZVOZ ELEKTRIČNE ENERGIJE

Član 7.
(Izvoz električne energije)

Izvoz električne energije iz carinskog područja Bosne i Hercegovine je svaki izvoz električne energije u druge države, bilo da je ona za tu namjenu prodana ili isporučena u "naturalnoj razmjeni električne energije" iz Bosne i Hercegovine, osim električne energije koja se isporučuje susjednim elektroenergetskim sistemima i koja služi za anuliranje odstupanja od dogovorenih programa razmjene nastalih u toku realizacije programa razmjene i anuliranje razlike između mjesečnog očitavanja brojila i evidentiranih satnih podataka (u daljnjem tekstu: izvoz).

Član 8.
(Carinska prijava za izvoz električne energije)

(1) Lice iz člana 3. ovog uputstva koje izvozi električnu energiju (u daljnjem tekstu: izvoznik) dužno je, do zadnjeg dana u tekućem mjesecu, za sav izvoz električne energije u prethodnom mjesecu podnijeti carinsku prijavu za izvoz električne energije (EX 1 prijava).

(2) Carinska prijava iz stava (1) ovog člana popunjava se u skladu sa propisima kojima je regulirano pitanje popunjavanja carinskih prijava i mora sadržavati svu količinu i vrijednost električne energije izvezene u mjesecu za koji se podnosi. U polju 31 carinske prijave mora se navesti i naznaka mjeseca na koji se prijava odnosi (npr. "izvoz u januaru 2007.").

(3) Carinska prijava iz stava (1) ovog člana podnosi se carinskoj ispostavi nadležnoj prema sjedištu izvoznika, koja ispostava je, shodno članu 396. stav 2. Odluke o provedbenim propisima Zakona o carinskoj politici Bosne i Hercegovine ("Službeni glasnik BiH", broj 63a/04 i 60/06), istovremeno i izlazni carinski ured. Uz carinsku prijavu prilaže se:

- a) faktura ili drugi odgovarajući komercijalni dokumenat koji, između ostalog, mora sadržavati podatke o prodavcu, kupcu, količini i vrijednosti izvezene električne

- energije, period na koji se odnosi, poziv na broj i datum ugovora o prodaji/isporuci električne energije,
- b) ovjerena izjava izvoznika o količini izvezene električne energije u periodu za koji se podnosi, na obrascu iz Priloga 2. ovog uputstva,
 - c) mjesečni izvještaj o prekograničnoj trgovini električnom energijom izdat i ovjeren od NOS BiH i
 - d) po potrebi, na zahtjev nadležnog carinskog organa, predložiti ugovor o prodaji/isporuci električne energije

GLAVA IV KONTROLA STANJA UVOZA I IZVOZA ELEKTRIČNE ENERGIJE

Član 9.

(Kontrola uvoza i izvoza električne energije)

(1) Ako nadležni kontrolni organ Uprave za indirektno oporezivanje, u kontroli kod uvoznika ili izvoznika električne energije, nađe da se podaci o električnoj energiji koja je prijavljena za uvoz ili izvoz ne slažu sa stanjem stvarno uvezene, odnosno izvezene električne energije, uvoznik odnosno izvoznik je nađenu razliku u količini i vrijednosti stvarno uvezene, odnosno izvezene električne energije dužan odmah prijaviti nadležnim carinskim organima za odgovarajući carinski postupak, pri čemu se ne isključuje primjena važećih kaznenih propisa.

Član 10.

(Saradnja u postupku kontrole uvoza i izvoza električne energije)

(1) Kontrolu uvoza i izvoza električne energije kod uvoznika i izvoznika te robe nadležni kontrolni organ Uprave za indirektno oporezivanje obavlja u skladu sa propisima o indirektnom oporezivanju, u kojoj kontroli je uvoznik i izvoznik dužan da saraduje na način određen tim propisima.

(2) Uprava za indirektno oporezivanje i NOS BiH će, radi provjere tačnosti podataka o prijavljenoj i ocarinjenoj električnoj energiji u uvozu i izvozu, međusobno saradivati, u kojoj saradnji mogu razmjenjivati podatke o uvozu i izvozu električne energije iz službenih evidencija.

GLAVA VI ZAVRŠNE ODREDBE

Član 11.

(Stupanje na snagu)

Ovo uputstvo stupa na snagu osmog dana od dana objavljivanja u "Službenom glasniku Bosne i Hercegovine".

Član 12.

(Prestanak važenja ranijih propisa)

Danom stupanja na snagu ovog uputstva prestaju da važe sva akta bivših carinskih uprava Entiteta i Uprave za indirektno oporezivanje, kojima su regulirana pitanja koja su predmet ovog uputstva.

Broj: 02 - 842/07

Datum: 27.02.2007. godine

DIREKTOR

Kemal Čaušević

Prilog 1.

I Z J A V A BROJ:				
O UVOZU ELEKTRIČNE ENERGIJE U BiH U MJESECU GODINE				
UVOZNIK (KUPAC):				
IB UVOZNIKA:			BROJ LICENCE DERK-a:	
PRODAVAC	BROJ I DATUM UGOVORA	BROJ I DATUM FAKTURE	KOLIČINA (MWH)	VRJEDNOST U
UKUPNO:				

Prilog: Mjesečni izvještaj NOS BiH o prekograničnoj trgovini električnom energijom, broj: od godine

Potvrđujem tačnost navedenih podataka:

U dana

M.P.
(potpis odgovornog lica uvoznika)

Prilog 2.

IZJAVA BROJ:				
O IZVOZU ELEKTRIČNE ENERGIJE IZ BiH U MJESECU GODINE				
IZVOZNIK (PRODAVAC):				
IB IZVOZNIKA:		BROJ LICENCE DERK-a:		
KUPAC	BROJ I DATUM UGOVORA	BROJ I DATUM FAKTURE	KOLIČINA (MWH)	VRIJEDNOST U
UKUPNO:				

Prilog: Mjesečni izvještaj NOS BiH o prekograničnoj trgovini električnom energijom, broj: od godine

Potvrđujem tačnost navedenih podataka:

U dana

M.P.
(potpis odgovornog lica izvoznika)